

三禮便蒙

三禮便蒙

賓上第十七

大宗伯以賓禮親邦國春見曰朝夏見曰宗秋見曰覲冬見曰遇

鄭鍔云天子之于諸侯以分言之則君臣以情言之則賓主故先王不待以純臣之義曲禮云天子當依而立諸侯北面而見天子曰覲天子當立而立諸公東面諸侯西面曰朝蓋名以特別其禮亦異注云諸侯春見曰朝受摯于朝受享于廟生氣文也秋見曰覲一受之于廟殺氣質也又孟子

云述職又總名皆曰朝故王制云天子無事與諸侯相見曰朝朝亦可名覲儀禮覲禮是也

其期則侯服歲一見甸服二歲一見男服三歲一見采服四歲一見衛服五歲一見要服六歲一見蕃國世一見

見秋官大行人按唐虞之制五載一巡守羣后四朝謂巡守之次年則東方之諸侯來巡守之第二年則南方來又明年西方來又明年北方來又明年天子復巡守此唐虞之制質大約每歲一方來朝不論遠近無有日期至周儀文大備不容煩

數故分遠近而不必分四方也王制五年一朝注明
說晉文時制度蓋伯取唐虞之制為法與大行人
自不同若周官云六年五服一朝又六年王乃時巡
周官偽書自不足據而或必扭與大行人合一亦
謬矣

其玉天子執冒圭四寸上公執桓圭九寸諸侯執信圭
七寸諸伯執躬圭諸子執穀璧五寸諸男執蒲璧
見玉人大宗伯典瑞大行人小行人

其服公自衮冕而下如王之服侯伯自鷩冕而下
如公之服子男自毳冕而下如侯之服孤自希冕

而下如子男之服卿大夫自元冕而下如孤之服

見司服注云自公之衮冕至卿大夫之元冕皆朝聘天子及助祭之服諸侯自相朝聘皆皮弁服又大行人云上公冕服九章侯伯冕服七章子男冕服五章注云九章自山龍以下七章自華蟲以下五章者自宗彝以下

其車同姓金路異姓象路四衛革路蕃國木路見巾車四衛者蠻服以內

其旂上公建常九旂侯伯七旂子男五旂

見司常注云常旌旗也旂其屬慘垂者也按觀

禮侯氏乘墨車者主秋覲言若春朝則金象革也

其幣圭以馬璋以皮璧以帛琮以錦琥以繡璜以黼

見小行人注云五等諸享天子用璧享后用琮其擯介上公介九人擯者五人侯伯介七人擯者四人子男介五人擯者三人

見大行人按介擯之儀有二一為交擯擯相傳辭往復自上而下自下而上更迭而徧其禮繇天子見諸侯諸侯自相朝則行之一為旅擯但陳

擯介而不傳辭其儀畧卿大夫聘問則行之
天子受諸侯朝覲大宗伯為上擯小行人為承
擯嗇夫為末擯大宗伯卿也小行人大夫也嗇
夫士也上公擯五人一卿一大夫三士侯伯四
卿一大夫二士子男三人一卿一大夫一士此見
于經與注疏者也其諸侯所陳之介亦當以卿
大夫士充之而經無明文以聘禮侯伯相聘上介
一人士介二人推之然則上公九介一卿一大夫七士
侯伯七介一卿一大夫五士子男五介一卿一大夫
三士歟惠田秦氏說

其稱謂天子曰予一人五官之長曰天子之吏天子
稱之同姓謂之伯父異姓謂之伯舅九州之長曰牧
天子稱之同姓謂之叔父異姓謂之叔舅夷狄蠻
稱于天子曰子庶方小侯入天子之國曰某人諸侯
見天子曰臣某侯某

見曲禮又玉藻云諸侯之于天子曰某土之守臣某
其在邊邑曰某屏之守臣某

凡諸侯之朝覲也始則告于祖奠于禩在途見日而
行逮日而舍

見曾子問

啟關則司關司門告于王小行人遂勞之

見周禮

至郊訝士為之前驅而辟環人命野廬氏聚橐以
誅觀伺者掌訝戒百官脩委積委人共其蓄聚
之物牛人共其牢禮積膳之牛羊人共其法羊大
行人饋芻米

大司徒注少曰委多曰積又遺人凡賓客掌其
道路之委積凡國野之道十里有廬廬有飲
食三十里有宿宿有路室路室有委五十里
有市市有候館候館有積大行人上公出入五

積侯伯出入四積子男出入三積鄭司農云出入五積謂之芻米也

郊勞之禮上公三問三勞侯伯再問再勞子男壹問壹勞

問問不恙也勞謂苦倦之也又有王后郊勞之禮玉人案十有二寸棗栗十有二列諸侯純九大夫純五夫人以勞諸侯注云夫人王后也

在館之禮諸侯有卿訝卿有大夫訝大夫有士訝士皆有訝掌訝次于門以待求索訝士為之蹕以戮暴客者

訝謂迎訝入館

將幣之禮皆三享

見大行人

致饗餼之禮上公九牢侯伯七牢子男五牢

三牲備為一牢

其享食之禮上公再裸而酢饗禮九獻食禮九
舉侯伯壹裸而酢饗禮七獻食禮七舉子男壹
裸不酢饗禮五獻食禮五舉

見大行人

此朝覲之大畧也若諸侯有不順服者王將有征討之

事則既朝覲王為壇于國外合諸侯而命事則為
會十二歲王或不巡守則六服盡朝朝禮畢王亦為
壇合諸侯以命政焉則為同

禹貢云四海會同大宗伯時見曰會殷見曰同是
也大行人職云時會以發四方之禁殷同以施天
下之政

會同之禮牛人共兵車之牛縣師會車人之卒伍
廩人治其糧食大司馬掌其政令司士作士從校
人齊馬色司弓矢授兵至之儀
作士從謂可以從于王者

遺人掌道路之委積司市掌賣債之事

債買也會同大眾所在來物以備之王昭禹云如此則師衆所聚無賤債貴賣以傷民財之患矣

觀掌客膳牲之禮則知會同不專在京師

掌客云王巡守殷國則國君膳以牲犢令百官百牲皆具從者三公祗一公之禮卿祗侯伯之禮大夫祗子男之禮士祗諸侯之卿禮庶子亦祗其大夫之禮注云國君者王所過之國也職方氏疏云殷國所在無常或向畿外侯國為之是不必專在京師則王有所過之國故掌客掌其禮

典路以路從車僕共革車司常置旌門司兵建車
之五兵司戈盾建貳車之戈盾此會同之車旗也掌
舍設櫜桓設轅門棘門旌門人門幕人共帷幕幄
帟綬掌次張大次小次此會同之次舍也

櫜桓行馬也所為衛者轅門者行險阻之地備非
常則次車為宮以其轅表門棘門謂止宿平地
築壇壝為宮以戟表門旌門謂王行晝止張帷
為宮則樹旌以表門人門者王行有所逢遇若
遊觀陳列周衛則立長大之人以表門又司戈盾
及舍設藩盾行則斂之此藩盾又設于櫜桓之外

三禮便義
朝覲之禮行于朝廟會同則行于國外故司儀令為壇

司儀將合諸侯則令為壇三成宮旁一門

有賜予外府掌之有牢禮掌客具之

外府凡會同共其財用之幣賡賜予之財用

盟約之書大司冠登之

又王府共珠槃玉敦封人飾其牛牲戎右贊牛耳

桃茢射鳥氏毆鳥鳶皆盟約之事也

禱祠之位小宗伯為之

疏云禱祠須預習威儀而為之當習威儀之時則

小宗伯為位

賓射之介射人使之

因會同而射則射人使大夫為上介士為眾介

諸侯有不至者則使卿大夫來問卿大夫來問則王使卿大夫與之行會同之禮謂之小會同

見象胥小祝小司馬

若夫天子有事諸侯使卿大夫來聘則為問一服來朝其他服諸侯使大夫來聘則為視

大宗伯時聘曰問殷頤曰視大行人時聘以結諸侯之好殷頤以除邦國之慝易氏被云或謂聘頤

即下經徧存徧頌徧省之事乃天子遣使以撫
邦國諸侯然大宗伯以此二事為賓禮而此職
亦有大客之儀則知非天子遣使之文又王制諸
侯之于天子也比年一小聘三年一大聘注云比年每
歲也小聘使大夫大聘使卿此晉文伯時所制也
所執之圭則琢圭也

玉人琢圭璋八寸璧琮八寸以覲聘注云琢文飾也
既聘享孤以執見其餘否也

大行人凡大國之孤執皮帛以繼小國之君
大夫入天子之國自稱曰陪臣某也